

12/10/1997

Mental judo media asing

ALKISAHNYA, teman perhatikan media asing bersungguh-sungguh benar nak rosakkan negara kita. Malaysia dijadikan sasaran untuk kepentingan mereka. Asakan demi asakan kita serap sehinggakan ada di kalangan kita yang cepat melatah. Istilah yang digunakan oleh Dr Mahathir ialah gelabah.

Ada pihak yang mengaitkan kenyataan-kenyataan Datuk Seri Dr Mahathir dengan kejatuhan nilai ringgit. Ini tidak saja disebut secara sembunyi-sembunyi. Malah ada yang menyatakan secara terang-terangan. Malah sebut mengenainya di TV.

Teman juga perhatikan media asing guna 'penganalisis' dalam negara dan juga negara jiran untuk hentam pemimpin kita. Malah ada yang cuba laga-lagakan Perdana Menteri dengan timbalannya.

Barangkali inilah permainan 'mental judo' yang mereka cuba lakukan. Sebabnya mudah. Kerana kepimpinan kita kukuh, mereka cuba hasut rakyat untuk mempersoalkan kewibawaan pemimpin-pemimpin kita. Ini termasuklah menyatakan Dr Mahathir dan Anwar tidak sekata.

Bagi teman, ini amat bahaya. Maklumlah dalam keadaan susah dan berjerebu ini, iblis pun boleh guna topeng malaikat. Mereka yang mudah goyah, cepat gelabah akan cepat percaya hasutan mereka ini.

Oleh itu, memang wajarlah Dr Mahathir mengeluarkan kenyataan kepada rakyat meminta mereka jangan mudah gelabah kerana setiap masalah ada penyelesaiannya. Ini teman setuju sebab Malaysia bukanlah sebuah negara yang tidak pernah melalui zaman sukar. Kita sudah melaluinya dan tahu pahit getirnya.

Maka, sewajarnya kita menguatkan iltizam dan bersama-sama mengatasi masalah yang dihadapi. Kalau perlu kita ikat perut sedikit untuk memastikan masalah dapat diselesaikan, eloklah kita lakukan.

Berwaspada, berjimat dan bersyukur bukanlah bermakna kita lemah. Sebaliknya, ia adalah penawar bagi serangan dari luar. Ini termasuklah serangan mental judo yang dilakukan oleh media asing.

(END)